

- राज्य निर्वाचन विभाग प्रदेश रा 199 विधानसभा हलकां री वोटर लिस्टां छापी।
- सुप्रीम कोर्ट रा मुख्य न्यायाधीश न्यायमूर्ति सूर्यकांत कानून रा विद्यार्थियां ऊँ किताबी ज्ञान ने न्याय, संवैधानिक मूल्यां अर सामाजिक उत्तरदायित्व सागे जोड़बा री अपील कीनी।
- प्रधानमंत्री नरेन्द्र मोदी काल संवारे 11 बज्यां आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला।
- इंडिया एआई इम्पैक्ट समिट मांय आज नई दिल्ली घोषणा पत्र मंजूर करी ज्यो-88 देश अर अंतर्राष्ट्रीय संगठन समर्थन कीनो।

000

राज्य रा मुख्य निर्वाचन अधिकारी री ओर ऊँ प्रदेश रा 199 विधानसभा हलकां री वोटर लिस्टाँ छाप दीरीजी है। इण रे मुजब प्रदेश मांय वोट देवण रा हकदार लोगां री तादाद 5 करोड़ 15 लाख 19 हजार 929 व्हे ग्यी है। इण मांय 2 करोड़ 69 लाख ऊँ बत्ता पुरुष, 2 करोड़ 45 लाख ऊँ बत्ती महिलावां अर 562 ट्रांसजेंडर मतदाता शामिल है। वोटर लिस्टां रा पुनरीक्षण पाछे वोट देवण रा हकदार लोगां री तादाद दो दशमलव शून्य-आठ फीसदी बधी है। जयपुर ज़िला मांय सब ऊँ बत्ती तीन दशमलव चार पांच फीसदी री बधोतरी दर्ज करी ज्यी। नुवी वोटर लिस्टां रे मुजब लिंगानुपात ई 909 ऊँ बध र 911 व्हे ग्यो है। आज न्यारा-न्यारा ज़िलां मांय सियासी पार्टियां रा नुमाइन्दां ने नुवी वोटर लिस्टां री प्रतियां दीरीजी। राज्य रा मुख्य निर्वाचन अधिकारी नवीन महाजन बतायो के वोट देवण रा हकदार लोग हाल ई वोटर लिस्टा मांय बदलाव करा सके है।

000

अंता विधानसभा हलका री वोटर लिस्टां 12 मार्च ने छापी जावेला।

000

सुप्रीम कोर्ट रा मुख्य न्यायाधीश न्यायमूर्ति सूर्यकांत कानून री भणार्ई ने किताबी जानकारी तांई सीमित राखण री बजाए वां ने न्याय, संवैधानिक मूल्यां अर सामाजिक उत्तरदायित्व ऊँ जोड़बा माथे ज़ोर दीनो है। न्यायमूर्ति सूर्यकांत आज जोधपुर रा राष्ट्रीय विधि विश्वविद्यालय मांय राख्यी ज्यां दीक्षात समारोह मांय बोल रह्या हा। सी.जे.आई. नौजवानां ऊँ संविधान रा मूल सिद्धांतां-न्याय, आज़ादी, बराबरी अर भाईचारा ने जिन्दगी अर पेशा रो आधार बणावण बाबत् कह्यो। वे कानून रा विद्यार्थियां ने तकनीक, आर्टिफिशियल इंटेलिजेंस अर डिजिटल सबूतां रा बधता उपयोग रा संदर्भ मांय लगातार सीखता रहवण री राय दीनी। दीक्षांत समारोह मांय स्नातक अर स्नातकोत्तर री भणार्ई अर शोध पूरो करण वाळां ने उपाधियां दे र नवाजी ज्यो।

000

भारत अर ब्राजील आज नई दिल्ली मांय डिजिटल भागीदारी, कम तादाद मांय मिलण वाळा खनिज अर खास खनिजां री खोज मांय एक-दूजा री मदद, एम.एस.एम.ई. अर तटीय हलकां समेत न्यारा-न्यारा मुद्दां ऊँ जुड़्या केई करार माथे सही कीनी। प्रधानमंत्री नरेन्द्र मोदी अर भारत रा दौरा माथे पधार्या ब्राजील रा राष्ट्रपति लुइज़ इनासियो लूला दा सिल्वा बीचे बातचीत व्ही।

ई दौरान दोन्यू नेता बहुपक्षीय मंचां माथे एक-दूजा री मदद समेत दोन्यू देशां रा भला अर दुनिया ऊँ जुड़्या न्यारा-न्यारा मुद्दां माथे विचार कीनो। एक भेळा बयान मांय प्रधानमंत्री नरेन्द्र मोदी कह्यो के राष्ट्रपति लूला री अगुवाई मांय भारत अर ब्राजील बीचे

रिश्ता मजबूत बणया है। श्री मोदी ब्राजील ने लैटिन अमरीका मांय भारत रो सब ऊँ मोटो करोबारी भागीदार बताता थकां कहयो के आवता पांच साल मांय दोन्यू देशां बीचे कारोबार 20 अरब अमेरिकी डॉलर ऊँ बत्ता लेवल ताई ले जावणो तैय करी ज्यो है।

000

इंडिया एआई इम्पैक्ट समिट मांय आज नई दिल्ली घोषणा पत्र मंजूर करी ज्यो। 88 देश अर अंतरराष्ट्रीय संगठन इण री हिमायत कीनी है। आर्टिफिशियल इंटेलिजेंस माथे वैश्विक सहयोग मांय आ एक खास उपलब्धि है। ओ घोषणा पत्र माली विकास अर सामाजिक कल्याण सारू एआई रो फायदो उठावण रा बारा मांय दुनिया री सहमति ने बतावे है। "सर्वजन हिताय, सर्वजन सुखाय" री सोच सागे बणायी ज्या ई घोषणा पत्र मांय ए.आई. रो फायदो सगळा ताई बराबर पूगावण माथे ज़ोर दियो ज्यो है।

000

इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव राजस्थान सरकार रा ए.आई. आधारित शासन अर डिजिटल बदलाव ने बधावो देवण री कोशिशों री सराहवणा कीनी है। वे आज 'राजस्थान पवेलियन' रो दौरा करण रे दौरान बोल रहया हा। श्री वैष्णव कहयो के राजस्थान री अ कोशिशों भारत री ए.आई. रणनीति रे मुजब है, जो समावेशी, जिम्मेदार अर नागरिक-केंद्रित विकास माथे आधारित है। ई दौरान श्री वैष्णव ने राजस्थान सरकार री शासन मांय ए.आई. काम लेवण, जन-केंद्रित सेवावां ने डिजिटल बणावण, स्वास्थ्य, भणार्ई-लिखाई, खेती-बाड़ी अर प्रशासनिक हलका मांय ए.आई. आधारित कोशिशों समेत केई खास पहलां री विगतवार जाणकारी दीरीजी। 'राजस्थान पवेलियन' मांय करीब 20 स्टॉल्स रे ज़रिये राज्य सरकार कानी ऊँ टेक्नोलॉजी रे मार्फत कर्या जा रहया नुवा कामां री जाणकारी दी जा रही है।

000

प्रधानमंत्री नरेन्द्र मोदी काल आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 131वीं कड़ी व्हेला। ओ कार्यक्रम संवारे 11 बज्यां आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ई सागे ई आकाशवाणी समाचार री वेबसाइट अर न्यूज़ ऑन ए.आई.आर मोबाइल ऐप, ए.आई.आर. न्यूज़, डी.डी. न्यूज़, प्रधानमंत्री रा दफतर-सेवा तीर्थ अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम प्रसारित कर्यो जावेला।

0000

नशीली चीजां रे खिलाफ काम कर रही ईकाई-एंटी नारकोटिक्स टास्क फोर्स बालोतरा ज़िला रा सिवाना हलका मांय तरकारियां अर दूजी साखां बीचे करीब सवा करोड़ रुपया मोल री अफीम री गैर-कानूनी खेती पकड़ी है। पुलिस 'ऑपरेशन शस्यविषम' रा तैत एक खेत ऊँ अमल रा दो हजार चार सौ ऊँ बत्ता पौधा बरामद कर र एक जणा ने पकड़ी ज्यो है। पुलिस महानिरीक्षक विकास कुमार नौजवानां ऊँ नशा रा कारोबार अर नशाखोरी ऊँ दूर रहवण बाबत् कहयो।

000

ई बीचे केन्द्रीय नारकोटिक्स ब्यूरो चित्तौड़गढ़ मांय उदयपुर-चित्तौड़गढ़ हाईवे अर निम्बाहेड़ा अर मध्यप्रदेश मांय नीमच ज़िला रा जावद मांय दस किलोग्राम अमल अर सौ किलोग्राम डोडा चूरो ज़ब्त कीनो है।

ब्यूरो रे मुजब ई मामला मांय तीन जणां ने गिरफ्तार करी ज्या है। एंटी नारकोटिक्स टास्क फोर्स उदयपुर अर आरे-सारे रा ज़िलां मांय करीब 50 लाख रुपया मोल री गैर-कानूनी नशीली चीजां ज़ब्त कर र सात आरोपितां ने गिरफ्तार कीना है।

000

सामाजिक न्याय अर अधिकारिता मंत्री अविनाश गहलोत उत्तर मैट्रिक छात्रवृत्ति री बाकी अर्जियां रा बेगा निपटारा रा हुकम दीना है। वे अहलकारां ने अर्जियां मांय रही कमियां आगी कर र वां ने जिला कार्यालयां मांय भेजण सारू कह्यो। मंत्री स्कूलां ने ई अर्जियां ने जांच पाछे ई आगे भेजण रा हुकम दीना।

000

प्रदेश मांय पारो चढबा सागे सर्दी रो असर कम पड़ रह्यो है। लारला 24 घंटां मांय बाड़मेर मांय बत्तो ऊँ बत्तो तापमान 33 दशमलव 4 डिग्री सेल्सियस नापी ज्यो। जोधपुर, फलौदी, जैसलमेर अर पाली मांय ई दिन दिन री बगत पारो 31 डिग्री सेल्सियस ने पार कर ग्यो। मौसम विभाग रे मुजब आवता दिनां तापमान मांय और बघोतरी रा आसार है।

000

पर्यावरण मंत्रालय री तकनीकी समिति अलवर रा कटीघाटी मांय प्रस्तावित चिड़ियाघर अर लायन सफारी री मंजूरी दे दीनी है। एक सौ अस्सी करोड़ रुपया रा खर्च वाळी आ परियोजना एक सौ चार हेक्टेयर हलका मांय बणायी जावेला। वन विभाग रे मुजब तीन दौर मांय व्हेवण वाळी ई परियोजना रो काम साल 2029 ताई पूरो व्हेवण रा आसार है। ई परियोजना रा पहला दौर सारू सरकार 96 करोड़ रुपया देवेला। प्रस्तावित चिड़ियाघर मांय 81 प्रजातियां रा 443 जिनावर लावण री योजना है।

000

हनुमानगढ़ मांय आज कृषि मेळो सरू व्ह्यो। 'अन्नदाता से अन्नपूर्णा' मुद्दा माथे लगयी ज्या तीन दिन रा ई मेळा रो मकसद किसानां ने नुवी तकनीकां अर खेती-बाड़ी रा उन्नत तरीकां री जाणकारी देवणो है। मेळा मांय आखा देश ऊँ आया कृषि वैज्ञानिक अर जाणकार किसानां ने खेती-बाड़ी ऊँ जुड्या स्टार्टअप, जैविक खेती, पाणी रा प्रबन्धन अर साखां ने बेचण री नुवी तकनीकां रा बारा मांय बतायो जा रह्यो है।

000